



Broj: 06/2-50-1-12-3/11
Sarajevo, 26. 1. 2011.

IZVJEŠTAJ

o radu Nezavisnog odbora kao nezavisnog tijela policijske strukture Bosne i Hercegovine za 2010. godinu

januar 2011. godine

Na osnovu člana 7. stav (1) tačka e) Zakona o nezavisnim i nadzornim tijelima policijske strukture Bosne i Hercegovine i člana 9. tačka e) Poslovnika o radu Nezavisnog odbora kao nezavisnog tijela policijske strukture Bosne i Hercegovine, Nezavisni odbor je na 12. sjednici, održanoj 26.1.2011. godine usvojio i Parlamentarnoj skupštini Bosne i Hercegovine podnosi sljedeći

I Z V J E Š T A J

o radu Nezavisnog odbora kao nezavisnog tijela policijske strukture Bosne i Hercegovine za 2010. godinu

POGLAVLJE I. UVODNE NAPOMENE

Nezavisni odbor osnovan je Zakonom o nezavisnim i nadzornim tijelima policijske strukture Bosne i Hercegovine ("Službeni glasnik BiH", broj 36/08), kao nezavisno tijelo Parlamentarne skupštine Bosne i Hercegovine.

Nezavisni odbor ima devet članova koji su imenovani na mandat od četiri godine odlukom Parlamentarne skupštine BiH ("Službeni glasnik BiH" broj 59/09).

POGLAVLJE II. NADLEŽNOSTI NEZAVISNOG ODBORA

Nezavisni odbor je, u skladu sa Zakonom o nezavisnim i nadzornim tijelima policijske strukture BiH i Poslovníkom o radu Nezavisnog odbora, nadležan za provođenje procesa odabira kandidata i predlaganje smjenjivanja policijskih rukovodilaca i zamjenika rukovodilaca policijskih tijela BiH; objavljivanje javnih konkursa i razmatranje prijave kandidata, vršenje odabira i dostavljanja ministru sigurnosti BiH imena najviše pet kandidata za rukovodioce i imena najviše pet kandidata za zamjenike rukovodilaca policijskih tijela BiH, predlaganje smjenjivanja rukovodilaca i zamjenika rukovodilaca policijskih tijela BiH, ako su počinili krivično djelo, osim za krivična djela iz oblasti sigurnosti saobraćaja, ili ako počine tešku povredu službene dužnosti, kao i u slučaju ako utvrdi da ne postižu odgovarajuće rezultate, razmatranje pritužbi na rad rukovodilaca i zamjenika rukovodilaca policijskih tijela BiH i obavještanje o tome ministra sigurnosti BiH i Vijeća ministara BiH, iniciranje pokretanja disciplinskog postupka protiv rukovodilaca i zamjenika rukovodilaca policijskih tijela BiH, obradu podataka i vođenje evidencije u skladu sa zakonom i drugim propisima i ostale poslove propisane zakonom, Poslovníkom o radu i drugim propisima.

POGLAVLJE III. IZVRŠENJE ZADATAKA IZ NADLEŽNOSTI ODBORA

Odjeljak A. Realizacija zadataka kroz održavanje sjednica Nezavisnog odbora

Nezavisni odbor je svoje programske aktivnosti u 2010. godini prvenstveno usmjerio na to da se u zadatim rokovima izaberu rukovodioci i zamjenici rukovodilaca policijskih tijela BiH. Najznačajnija aktivnost koju je Nezavisni odbor u 2010. godini proveo iz svoje nadležnosti jeste proces odabira kandidata za direktora i zamjenika direktora Granične policije BiH, direktora i dva zamjenika direktora Direkcije za koordinaciju policijskih tijela BiH i zamjenika direktora Državne agencije za istrage i zaštitu BiH.

Na 5. sjednici, koja je održana 10. 2. 2010. godine Nezavisni odbor je razmatrao pristigle prijave na javni konkurs za izbor direktora i zamjenika direktora Granične policije BiH, direktora i dva zamjenika direktora Direkcije za koordinaciju policijskih tijela BiH i zamjenika direktora Državne agencije za istrage i zaštitu BiH. Nezavisni odbor je konstatirao da od ukupno četrnaest prijavljenih kandidata, trinaest kandidata ispunjavaju formalne uslove tražene konkursom i da će biti pozvani na intervju. Delegat Hazim Rančić je na 42. sjednici Doma naroda postavio delegatsko pitanje Nezavisnom odboru da li će na vrijeme biti ispunjeni uslovi iz Mape puta za liberalizaciju viznog režima, a iz nadležnosti Nezavisnog odbora. Nezavisni odbor je na 5. sjednici utvrdio odgovor na delegatsko pitanje u kojem je obavijestio delegata Hazima Rančića da je Nezavisni odbor raspisao konkurs za upražnjene pozicije rukovodilaca policijskih tijela BiH i da je razmotrio pristigle prijave, te da će obaviti intervju sa kandidatima koji ispunjavaju uslove u što kraćem vremenskom periodu.

Nezavisni odbor je održao intervju sa kandidatima za direktore i zamjenike direktora policijskih tijela u BiH dana 25. i 26. februara 2010. godine.

Nezavisni odbor je održao 6. sjednicu 5. 3. 2010. i na toj sjednici utvrdio rang-listu uspješnih kandidata sa kojima je obavljen intervju. Nakon izvršenog bodovanja, a na osnovu odredbe člana 13. Poslovnika o radu Nezavisnog odbora kao nezavisnog tijela policijske strukture BiH, članovi su sastavili rang-listu uspješnih kandidata. Na osnovu Zakona o nezavisnim i nadzornim tijelima policijskih struktura u BiH, Nezavisni odbor je rang-listu dostavio ministru sigurnosti BiH na daljnji postupak.

Na 7. sjednici Nezavisnog odbora, koja je održana 14.4.2010. razmatrani su i usvojeni Izvještaj o radu Nezavisnog odbora za 2009. godinu i Plan rada Nezavisnog odbora za 2010. godinu. Predstavnički dom je usvojio Izvještaj o radu Nezavisnog odbora za 2009. i Plan rada Nezavisnog odbora za 2010. na svojoj 77. sjednici održanoj 12.5.2010., a Dom naroda na 47. sjednici održanoj 24. 6. 2010.

Na 8. sjednici održanoj 1.7.2010. godine Nezavisni odbor je razmatrao inicijativu za izmjenu člana 59. Zakona o policijskim službenicima Bosne i Hercegovine. Nezavisni odbor je prilikom provođenja konkursne procedure za izbor direktora i zamjenika direktora

Granične policije BiH, direktora i dva zamjenika direktora Direkcije za koordinaciju policijskih tijela BiH i zamjenika direktora Državne agencije za istrage i zaštitu BiH uočio da je Zakonom o policijskim službenicima BiH propisano da kandidati za rukovodioca i njegovog zamjenika moraju imati čin glavnog inspektora ili viši čin i najmanje tri godine u tom činu, te da je ovom odredbom velikom broju potencijalnih kandidata ograničena mogućnost kandidiranja na pozicije rukovodilaca policijskih tijela, zbog toga što ne posjeduju čin glavnog inspektora u trajanju od tri godine. Iskustvo s konkursa koji je provodio Nezavisni odbor, na koji se za šest pozicija prijavilo 13 kandidata, je navelo Nezavisni odbor da otvori raspravu o ovom pitanju. Nezavisni odbor je odlučio obratiti se sa zahtjevom Državnoj agenciji za istrage i zaštitu, Graničnoj policiji BiH, Federalnom ministarstvu unutrašnjih poslova, Ministarstvu unutrašnjih poslova Republike Srpske i Policiji Brčko Distrikta BiH da dostave podatke o ukupnom broju radnih mjesta za koja se traži čin samostalnog i čin glavnog inspektora, te koliko je samostalnih inspektora i glavnih inspektora sa stečenim zvanjem pravne, kriminalističke ili druge struke sigurnosnog smjera. Prije pokretanja inicijative za izmjenu zakona, potrebno je imati podatke o broju glavnih i samostalnih inspektora u BiH.

Na 9. sjednici koja je održana 27.9.2010. ponovo je vođena rasprava o potrebi pokretanja inicijative za izmjenu člana 59. Zakona o policijskim službenicima Bosne i Hercegovine. S obzirom da podaci koje je dostavilo Federalno ministarstvo unutrašnjih poslova ne sadrži podatke o broju glavnih i samostalnih inspektora u kantonalnim ministarstvima unutrašnjih poslova, Nezavisni odbor je odlučio obratiti se sa zahtjevom ministarstvima unutrašnjih poslova svih kantona u Federaciji BiH, da dostave podatke o ukupnom broju radnih mjesta za koja se traži čin samostalnog i čin glavnog inspektora. S obzirom da je Planom rada Nezavisnog odbora za 2010. Godinu predviđeno održavanje sastanka sa direktorima i zamjenicima direktora policijskih agencija BiH s ciljem sagledavanja stanja njihovog rada i rada policijskih agencija na nivou BiH, Nezavisni odbor je odlučio održati tematsku sjednicu Stanje sigurnosti u BiH, na koju bi pozvali direktore Granične policije BiH, Državne agencije za istrage i zaštitu BiH i Direkcije za koordinaciju policijskih tijela BiH.

Na 10. sjednicu Nezavisnog odbora, održanu 29. 10. 2010., pozvani su direktori Granične policije BiH, Državne agencije za istrage i zaštitu BiH i Direkcije za koordinaciju policijskih tijela BiH, kada se razgovaralo o stanju sigurnosti u Bosni i Hercegovini. Informirali su članove Nezavisnog odbora o stanju sigurnosti u BiH, svaki iz aspekta svoje nadležnosti. Izložili su kako postoji izuzetno dobra saradnja između policijskih agencija u BiH, a od problema su naveli problem smještaja Direkcije za koordinaciju policijskih tijela BiH. Nezavisni odbor je odlučio obavijestiti Parlamentarnu skupštinu BiH, Vijeće ministara BiH i Ministarstvo sigurnosti BiH o potrebi rješavanja problema trajnog smještaja Direkcije za koordinaciju policijskih tijela BiH.

Na 11. sjednici održanoj 17. 12. 2010. godine članovi Nezavisnog odbora su još jednom potvrdili svoju opredijeljenost da u svom radu daju snažnu podršku radu institucijama koje rade za dobrobit građana Bosne i Hercegovine, posebno u segmentu koji garantuje

potpunu sigurnost njenim građanima. Također je odlučeno da za narednu sjednicu Nezavisnog odbora predsjednik u saradnji sa sekretarom i savjetnikom Nezavisnog odbora pripremi Izvještaj o radu Nezavisnog odbora za 2010. i Plan rada Nezavisnog odbora za 2011.godinu, kako bi ga Nezavisni odbor usvojio i na vrijeme dostavio Parlamentarnoj skupštini BiH na usvajanje.

Potrebno je naglasiti da tokom 2010. godine nije bilo pritužbi na rad rukovodilaca i zamjenika rukovodilaca policijskih agencija Bosne i Hercegovine. Nezavisni odbor u 2010. godini nije ocijenio potrebnim inicirati pokretanja disciplinskog postupka protiv rukovodilaca i zamjenika rukovodilaca policijskih tijela BiH, a niti predložiti njihovu smjenu zbog počinjenog krivičnog djela, teške povrede službene dužnosti, nepostizanja odgovarajućih rezultata ili osnovanih žalbi građana i drugih subjekata na njihov rad.

Odjeljak B. Javnost rada i saradnja sa međunarodnim organizacijama

Rad Nezavisnog odbora su pratili i sjednicama prisustvovali predstavnici USAID/PSP, OHR-a i EUPM-a. Posebno veliko interesovanje iskazali su predstavnici OHR-a/Jedinice za reformu sektora javne sigurnosti u vezi pokrenute inicijative za izmjenu člana 59. Zakona o policijskim službenicima BiH. Sve sjednice Nezavisnog odbora pratili su zaposleni u Sektoru za odnose s javnošću Parlamentarne skupštine BiH te predstavnici medija u BiH. Javnost se može upoznati sa radom Nezavisnog odbora i kroz akte koje je ovaj odbor usvajao i kroz zapisnike, jer su objavljeni na web stranici Parlamentarne skupštine BiH. Na ovaj način je osigurana transparentnost u radu Nezavisnog odbora.

Nezavisni odbor je pored održanih sedam sjednica, imao niz neformalnih sastanaka na kojima se dogovaralo o budućim aktivnostima Nezavisnog odbora, uslovima rada i drugim pitanjima.

Odjeljak C. Administrativno-tehnička podrška u radu

Zajednička služba Parlamentarne skupštine BiH je po Zakonu o nezavisnim i nadzornim tijelima policijske strukture u BiH zadužena da pruža svu administrativno-tehničku podršku u radu Nezavisnog odbora. Zajednička služba je osigurala potrebne uslove za rad Nezavisnom odboru kroz angažovanje stručnog osoblja, ali i kroz materijalno tehničke uslove osiguravajući prostor i druge uslove za nesmetan rad.

POGLAVLJE IV. PREPORUKE I ZAKLJUČCI

Nezavisni odbor je realizirao većinu programskih aktivnosti planiranih u 2010. godini, a u skladu sa Zakonom o nezavisnim i nadzornim tijelima policijske strukture Bosne i Hercegovine.

Nezavisni odbor predlaže Parlamentarnoj skupštini BiH da usvoji Izvještaj o radu Nezavisnog odbora kao nezavisnog tijela policijske strukture u BiH za 2010. godinu.

**PREDSJEDNIK
NEZAVISNOG ODBORA
Žiko Krunić, s.r.**